

Constituziun dalla pleiv da Falera

I. Determinaziuns generalas

Art. 1 Concepziun

Sefundond sils artechels 98 e 99 dalla constituziun cantunala e sin la constituziun dalla baselgia catolica dil cantun Grischun exista a Falera ina pleiv roman-catolica. Ses cunfins secuarclan cun quels dalla vischuna politica da Falera.

Art. 2 Commembers

Commembers dalla pleiv ein, senza differenza dalla naziunalidad e dil dretg da burgheis, tuttas persunas da confessiun catolica che habiteschan a Falera.

L'extrada ord la pleiv vegn renconuschida mo sin fundament d'ina declaronza en secret davart l'extrada ord la Baselgia catolica. Ella dispensescha dallas obligaziuns finzialas pér igl onn da taglia che suonda. Per igl onn da taglia current ei la taglia mo da pagar pro rata temporis.

Art. 3 Intent

- a) La pleiv procura per ils mieds necessaris dalla pastoraziun e protegia la libertad digl operar pastoral.
- b) Ella promova il contact denter ils commembers e sustegn la veta religusa e moralia en la pleiv en collaboraziun cun il plevon e ses gidonters.
- c) Ella risguarda ils basegns specials dils hospes, dil personal da stagiun e dils luvrers jasters.
- d) Ella promova vicendeivlamein las relaziuns cun cristians buca catolics e gida a sligiar pensums generals el spért ecumen.

Art. 4 Petiziun

Scadin commember dalla pleiv sa inoltrar propostas, petiziuns e reclamaziuns che pertuccan damondas specialas ni generalas dalla pleiv. Quellas ston vegnir fatgas a secret per mauns dalla suprastanza dalla pleiv. La suprastanza ei obligada da prender posiziun a secret viers quellas enteifer 60 dis, ni a bucca schilunsch ch'ina radunanza dalla pleiv ha liug enteifer quei termin.

Art. 5 Iniziativa

Propostas a secret per mauns dalla radunanza da pleiv ein d'inoltrar cun ina cuorta motivaziun alla suprastanza. Ellas ston esser suttascrettas da silmeins vegn votants ni votantas. La suprastanza ei obligada da suttametter ina tala petiziun enteifer treis meins alla radunanza da pleiv e quei ensemens cun sia posiziun ni eventualmein cun ina counterproposta.

Art. 6 Moziun

Scadin votant ni votanta ha il dretg da far propostas a caschun da radunonzas da pleiv, era partenent fatschentas e caussas ch'ein buca publicadas sin la gliesta da

tractandas. Vegg ina tala proposta acceptada dalla radunanza, sto la suprastonza su ttametter rapport e proposta alla proxima radunanza da pleiv.

Art. 7 Interpellaziun

A caschun d'ina radunanza da pleiv sa scadin votant e scadina votanta pretender sclariment dalla suprastonza pertucccont situaziun ni liquidaziun d'ina fatschenta dalla pleiv. Quella sto buca star en connex cun las tractandas publicadas dalla radunanza.

Art. 8 Dretg da votar e d'elecziun

Il dretg da votar e d'elecziun possedan tuts umens catolics e dunnas catolicas suenter haver cumpleniu 18 onns ed aschilunsch ch'els han il dretg da burgheis svizzer e dimora en la pleiv ed ein cheu sesents dapi treis meins. Persunas jastras (digl exterior) possedan tuts dretgs dils indigens, schilunsch ch'ellas ein en possess d'ina lubientscha da dimora.

Art. 9 Eligibladad

Scadin commember dalla pleiv cul dretg da votar sa veggir eligius en in uffeci ni en ina cumissiun dalla pleiv.

Art. 10 Exclusiun

Conjugals, parents da saung en lingia ascendenta e descendenta sco era parents sa saung e quinaus e quinadas en emprem grad dalla lingia laterala (fargliuns, quinaus e quinadas) astgan buca far part a medem temps dil medem uffeci ni dalla medema cumissiun.

Art. 11 Recusaziun

In commember d'in uffeci dalla pleiv, d'ina cumissiun ni dalla radunanza da pleiv ei obligaus da prender stgisa tier votaziuns e tractaziuns, sch'ina fatschenta pertucca el sez, ni sch'in da ses parents tochen el grad menziunaus egl art. 10 ha in interess persunal direct en caussa. En cass da contestazion decida igl uffeci pertucccont en absenza digl interessau, schebein ils motivs da prender stgisa seigien obligonts.

II. Determinaziuns organisatorias

Art. 12 Organs

Ils organs dalla pleiv ein:

1. La radunanza da pleiv
2. La suprastonza dalla pleiv
3. Ils revisurs da quen

1. La radunanza da pleiv

Art. 13

La radunanza da pleiv ei il suprem organ dil cumin-baselgia; ella cumpeglia ils commembers cun dretg da votar.

Art. 14 Cumpetenzas

La radunonza da pleiv ha las suandontas cumpetenzas:

- a) elecziun dil plevon enteifer las prescripcions ecclesiasticas,
- b) elecziun dil president, da 3 commembers e 2 suppleants dalla suprastanza per dus onns,
- c) elecziun da 2 revisurs da quen e d'in suppleant per dus onns,
- d) relasch e midadas dalla constituziun, dalla lescha da taglia sco era dad auters uordens obligonts,
- e) approbaziun dil quen annual e dil preventiv e fixaziun dil pei da taglia,
- f) conclus davart expensas che survargan la cumpetenza dalla suprastanza,
- g) decisiuns sur damondas resalvadas expressivamein alla radunonza da pleiv ni che vegnan suttamessas dalla suprastanza alla pleiv.

Art. 15 Convocaziun

La radunonza da pleiv ha liug mintg'onn la primavera, sil pli tard el meins matg. La convocaziun ei da far silmeins 10 dis avon entras publicaziun el Fegl ufficial della Surselva.

Radunonzas extraordinarias vegnan convocadas sin giavisch da silmeins 10 commembers ni sche la suprastanza anfla quei per opportun.

Art. 16 Conclus

La radunonza sa concluder, sch'ella ei vegnida convocada el senn da questa constituziun.

Tier conclus ei la maioritad dils votants necessaria; tier midadas dalla constituziun drova ei ina maioritad qualificada da 2/3.

Tuttas tractandas ein da predeliberaler entras la supastanza. Tractandas che vegnan proponidas pér a caschun dalla radunonza vegnan surdadas alla suprastanza per l'examinaziun preliminara. Ina excepciuon ei lubida mo cun risguard da fatschentas urgentas, e quei entras decisiun d'ina maioritad da duas tiarzas dils votants. Per regla vegn ei decidiu cun tschenna, sch'ei vegn buca pretendiu scrutini.

Tier votaziuns ed elecziun per scrutini vala el secund scrutini il relativ pli. Ein las vuschs ulivas decida: tier fatschentas il president, tier elecziuns la sort.

2. La suprastanza

Art. 17 Concepziun

La suprastanza ei igl organ executiv ed administrativ dalla pleiv sco era organ dil Corpus Catholicum.

Ella consita dil president e quater commembers. Il plevon ei ex officio commember dalla suprastanza. Ella vegn, cun excepciu dil plevon, eligida per dus onns entra la radunanza da pleiv e seconstituescha priu ora il president sco suandon: actuar/vicepresident, cassier e dus assessurs.

Art. 18 Competenzas

Las obligaziuns e competenzas dalla suprastanza ein:

- a) representar la pleiv enviers autoritads ecclesiasticas, cantunalas e burgheisas,
- b) preparar las fatschentas per mauns dalla radunanza ed exequir ils conclus,
- c) menar il quen annual, administrar las taglias, la facultad e preparar il preventiv,
- d) concluder sur d'expensas unicas entochen frs. 5'000.-- ,
- e) menar process e recuors e far contracts e convenziuns, aschilunsch che spesas e cuosts survargan buc frs. 5'000.-- ,
- f) fixar la paga dil plevon, risguardond las directivas dadas digl ordinariat e dil Corpus Catholicum,
- g) survigilar las extradas e comunicar quellas agl uffeci da taglia,
- h) cooperar tier l'execuziun da leschas, uordens e conclus,
- i) eleger il caluster, igl organist ed ils necessaris gidonters tenor basegns,
- k) liquidar tuttas fatschentas che stattan buca en la competenza dalla radunanza da pleiv ni d'ina autra instanza.

Art. 19 President

Il president convochescha las radunanzas da pleiv e dalla suprastanza e meina quellas. Per cass ch'el ei impedi vegn el substituius digl actuar.

Art. 20 Actuar

Igl actuar scriva ils protocols dallas radunanzas da pleiv e dallas sesidas dalla suprastanza. Il protocol ei da presentar alla proxima radunanza e sesida. Igl actuar suttascriva ils conclus ensemen cun il president.

L'administraziun digl archiv dalla pleiv vegn surschada agl archivar da vischernaunca.

Art. 21 Cassier

Il cassier meina il quen dalla pleiv ed administrescha la facultad dalla pleiv e dalla pervenda e retrai la taglia incassada dalla canzlia communal. El trai en las unfrendas e paga ils quens currents dalla baselgia e dalla pleiv.

Art. 22 Delegaziun

La suprastanza sa delegar pensums al president, a singuls commembers ni ad ina cumissiun per la liquidaziun. Davart il resultat han ils incumbensai da rapportar alla suprastanza.

Art. 23 Uorden da fatschenta

La suprastonza serimna sin invitaziun dil president schi savens che las fatschentas damondan quei ni sin giavisch da 3 commembers.

Ella sa concluder, sche silmeins 3 commembers ein presents. Conclus vegnan pri cun il relateiv pli dallas vuschs valeivlas. En cass da paritad decida tier votaziuns il president, tier elecziuns la sort.

Conclus sin via da circulara ein valeivels mo en cass d'unanimitad.

3. Revisurs da quen

Art. 24 Cumpetenza

Ils revisurs examineschan il quen annual ed il menaschi dalla suprastonza, aschilunsch che quei stat en connex cun l'administraziun della facultad. Els fan rapport e proposta en secret alla radunanza.

III. Ordinaziuns economicas

Art. 25 Administraziun dalla facultad

La pleiv procura per ina buna administraziun da siu fatg. Il quen da menaschi duei sebasar sin in saun fundament, fagend amortisaziuns e reservas. Il quen da menaschi ei da serrar giu mintgamai per ils 31 da december.

La facultad ei da pazzar cun segirezia sufficiente.

Art. 26 Taglia da pleiv

Per curclar las expensas currentas per cultus e pastoraziun, per pagar eventuals deficits e per fundar eventualmein la facultad da baselgia e fonds, sco era per auters basegns dalla pleiv, vegn incassau ina taglia da pleiv (taglia da cultus). La lescha da taglia circumscriva ils detagls.

Art. 27 Diever dalla taglia

La taglia vegn duvrada per:

- a) expensas dalla pastoraziun e dil cultus,
- b) ereger e mantener objects che surveschan alla pleiv,
- c) augmentar la facultad dalla pleiv (fonds, fundaziuns),
- d) auters interess e basegns dalla pleiv.

Art. 28 Approbaziunepiscopal

Per vender, brattar ni impegnar beins da fonds ecclesiastics inclus objects da cultus e d'art, per cumprar funs e prender si emprests sco era per baghegiar e renovar baghetgs, drova ei l'approbaziun digl ordinariat episcopal.

Pigl auter valan per l'administraziun dalla facultad dalla baselgia e pervenda las determinaziuns respectivas dil dretg canonic e dalla lescha cantunala davart igl impunder la facultad da corporaziuns.

IV. Recuors

Art. 29 Dretg da recuors

Encunter conclus e decrets dalla suprastonza e dalla radunanza da pleiv sa veginr recurriu enteifer 20 dis tier la cumissiun dil Corpus Catholicum tenor art. 25ss dalla constituziun cantunala dalla baselgia catolica dil cantun Grischun.

V. Determinaziuns finalas

Art. 30 Revisiun

La consituziun sa da tut temps veginr revedida parzialmein ni totalmein.

Leutier ei l'approbaziun dalla cumissiun dil Corpus Catholicum necessaria.

Art. 31 Vigur

Questa constituziun passa en vigur cun l'acceptaziun entras la radunanza da pleiv dils 7 da matg 2004 e cun l'approbaziun dalla cumissiun dil Corpus Catholicum.

Cheutras vegin la constituziun dils 21 da matg 1976 messa ord vigur.

Concluiu aschia dalla radunanza da pleiv dils 7 da matg 2004.

Per la pleiv catolica da Falera:

Falera, ils 7 da matg 2004

Il president: Ignaz Cathomen

Igl actuar: Pius Winzap

Approbau dalla cumissiun dil Corpus Catholicum:

Cuera, ils 20 d'october 2004

Il president: Luis Pajarola

Igl actuar: Marius Augustin